

## Tabell 3-fk

### Anslag på frie inntekter i 2024 for fylkeskommunane

Tabell 3 viser anslag på vekst i frie inntekter for fylkeskommunane frå 2023 til 2024. Som frie inntekter reknar ein inntektsskatt (inkl. naturressursskatt) og rammetilskot. Tabellen viser veksten etter anslag på rekneskap for 2023. Alle tala er i nominelle kroner. Prisveksten i kommunesektoren frå 2023 til 2024 er anslått til 4,3 prosent. Veksten er berekna med gjeldande fylkesstruktur og inntektssystem i 2024, og for dei nye/delte fylkeskommunane er det gjort eit anslag på dei frie inntektene i 2023 i berekninga av veksten frå 2023 til 2024. Variasjonen i veksten mellom fylkeskommunane er påverka av mellom anna innføringa av eit nytt inntektssystem frå 2024 (jf. fordelingsverknadene i tabell B-fk), i tillegg til befolkningsvekst, endringar i andre kriteriedata og andre forhold.

Veksten i frie inntekter frå 2023 til 2024 blir berekna frå anslag på rekneskap for 2023 i Prop. 1 S for 2024. Skatteinntektene for fylkeskommunane er anslått til 43,250 mrd. kroner i 2024 og 41,0 mrd. kroner i 2023. Anslaget omfattar ein auke i skatteanslaget for 2023 med 536 mill. kroner samanlikna med anslaget i revidert nasjonalbudsjett 2023. Inntektsveksten frå 2023 til 2024, ut frå anslag på rekneskap, er nominelt anslått til 5,2 prosent. I berekninga av veksten i frie inntekter blir naturressursskatten halden på same nivå i 2023 og 2024. For begge åra blir det nytta tal for naturressursskatt frå inntektsåret 2021.

Skjønstilskot som blir fordelt i løpet av året i 2023 er ikkje inkludert i vekstberekninga for kvar fylkeskommune. For 2023 er det ufordelte skjønnet (reservepotten) på 50 mill. kroner. I 2024 er reservepotten for fylkeskommunane flytta over til reservepotten for kommunane på kapittel 571, post 64.

#### Om skatteinntektene

I skatteanslaget er anslaget for skatteutjamning inkludert. Skatteinntektene, inkl. skatteutjamning, er den storleiken det er knytt mest uvisse til når ein reknar veksten i frie inntekter. Samla inntektsskatt for fylkeskommunane i 2023 og 2024 blir anslått av Finansdepartementet i statsbudsjettet for 2024. For å anslå skatteinntektene for kvar fylkeskommune, tek ein utgangspunkt i skatt per innbyggjar i fylkeskommunen i 2022 og skriv fram talet med innbyggjartalet i 2023. Det er tatt utgangspunkt i skattetal på kommunenivå, aggregert til ny fylkesstruktur 2024. Ut ifrå skatt i 2022 framskriven med innbyggjartal for 2023, blir det rekna ut eit anslag for kvar fylkeskommune sin prosentdel av det samla skatteanslaget for 2023 og 2024. Dette trekkjer i retning av at fylkeskommunar som har høgare vekst i talet på innbyggjarar enn landsgjennomsnittet frå 2023 til 2024, òg får høgare vekst i skatteinntektene enn det som følgjer av føresetnadene for berekninga. Det motsette vil kunne vere tilfellet for fylkeskommunar med svakare vekst i talet på innbyggjarar enn gjennomsnittet for landet. Skatteutjamninga for 2024 tek utgangspunkt i innbyggjartalet per 1. januar 2023.

#### Om rammetilskotet

Rammetilskotet for 2023 er henta frå revidert nasjonalbudsjett 2023. For fylkeskommunar som blir delte i 2024 er rammetilskot 2023 anslått ut ifrå andelen rammetilskot i 2024 med gjeldande inntektssystem i 2023, berekna med kriteriedata for 2024. Anslag for fylkeskommunar som blir delte er derfor usikre. Rammetilskotet for 2024 er vist i tabell 1-fk.

For å gjere tala samanliknbare, noko som er ein føresetnad for å kunne berekne veksten, blir anslaget på frie inntekter for 2023 korrigert for oppgåveendringar, regelendringar og innlemmingar av øyremerkte tilskot i 2024. I 2024 er summen av desse endringane om lag 606,1 mill. kroner i 2023-kroner. Korreksjonane er viste i innleiinga til Grønt hefte (i 2024-kroner). Korreksjonar på fylkeskommunenivå er i hovudsak gjort etter kostnadsnøkkelen.

Endringar i fordelingar av saker med ei særskild fordeling (jf. tabell C-fk) er behandla som ei oppgåvekorrigerings i utrekninga av vekstanslaget for kvar einiskild fylkeskommune. For 2024 gjeld det midlar til ras- og skredsikring og midlar til nullutsleppsferjer. Ny fordeling av desse sakene påverkar dermed ikkje det samla vekstanslaget for fylkeskommunane.

### **Kolonne 1 – Anslag på frie inntekter i 2023**

Kolonne 1 viser frie inntekter etter anslag på rekneskap for 2023. Rammetilskotet per fylkeskommune, eksklusive skatteutjamninga, er henta frå revidert nasjonalbudsjett for 2023, medan skatteinntektene er framskrivne i samsvar med skatteanslaget for 2024 i Prop. 1 S (2023–2024).

### **Kolonne 2 – Anslag på oppgåvekorrigerede frie inntekter i 2023**

Inntektene i kolonne 2 er anslag på rekneskap korrigerede for oppgåveendringar, regelendringar og innlemming av øyremerkte tilskot. Det er teke utgangspunkt i det same anslaget som i kolonne 1. Oppgåveendringane er omtalte nærare i innleiingsteksten til Grønt hefte og Prop. 1 S (2023–2024) for Kommunal- og distriktsdepartementet.

### **Kolonne 3 – Anslag på frie inntekter i 2024**

Kolonne 3 viser anslag på frie inntekter i 2024. Rammetilskotet til fylkeskommunane, eksklusive skatteutjamninga, er henta frå kolonne 3 i tabell 1-fk. Skatteinntektene er framskrivne i samsvar med skatteanslaget for 2024 i Prop. 1 S (2023–2024), og i tråd med omtala i innleiinga over.

### **Kolonne 4 – Anslag på korrigert vekst frå 2023 til 2024**

Kolonne 4 viser anslag på oppgåvekorrigert vekst i frie inntekter frå anslag på rekneskap 2023 til 2024 for den einiskilde fylkeskommune (kolonne 3 - kolonne 2).

### **Kolonne 5 – Anslag på korrigert vekst i prosent frå 2023 til 2024**

Kolonne 5 viser prosentvis nominell oppgåvekorrigert vekst frå anslag på rekneskap 2023 til 2024.